



## Wöschwyber 04

1.  
Mir si uf d Poscht, hei nes Nümmeli zoge, si agschtange.  
Zwüsche Smarties, Heftli, Whiskas, Partyschlange.  
Wosch Margge choufe, Päckli ufgä, Gäud ablade –  
Bisch totau lätz, üsi Poscht isch jitz e Chrämerrade.
2.  
Füfzg Jahr ischs här, da het es Wunder z Bärn schtattgfunge.  
Z'Bärn gits hüt no Wunder, YB isch nümme dunge.  
Es Wunder isch em Schtapi gscheh, s geit nid ums Gingge.  
Sit dä chly linggs isch gfare, giut är jitz aus Lingge.
3.  
Uf e Mars wei d Amis nöischtens expandiere.  
Und uf em Mond e Wäutruumschtützpunkt inschtalliere.  
Die Mission isch gheim, si hoffe, s würd ne glinge,  
Dert obe -zmingscht - e Spur vom Busch sym Hirni z finge.  
Die Mission bringst nit. Drum ds einzige wo würd nütze:  
E gummi drm. Dä muesch vor syre Dümme schütze.
4.  
We dr Schtorch schlapp macht u nümme wott Chindli bringe.  
Mit in Vitro, Gen, Hormon wei mirs erzwingen.  
U wes uf d Wäut chunnt, lueg das Baby doch mau gnau a.  
S het Schlampiohre, e langi Nase, chräyt „Chihuahua“.
5.  
Zersch muess dr Bär ewägg, dri – drus – nei dri ids Logo.  
Wintergärten heize, nei – mou – nei – a gogo.  
Wasserfalle chunnt – chunnt nid – är chunnt – s isch gloffe.  
Im Ändeffekt isch z Bärn nid nur de Tschäppät bsoffe.
6.  
Ou mir drü Wyber si im MusicStar ga singe,  
Dr von Rohr meint: "Dir sit de geil, da isch Dräck dinne.  
Dä vom Blick wott üs a d Wösch, üs blutt begaffe.  
Däm hei mer ds Mösche churz gwäsche, jitz het dä e Schlaffe.
7.  
D CVP suecht Lüt, wo die Partei wei länke.  
S wotts niemer mache, tja, das cha mer sich ja änke.  
Dä truurig Jammerhuufe us luter fade Würschtli!  
Die hei kei Biss meh, das chunnt vo dene Bürschtl.
8.  
D Nati B heisst Challenge, d A heisst Super League now,  
Si schutte wacker, tapfer, but not like the milk cow.  
Dr Schiiverband heisst simply Swiss Ski – das weiss jede.  
Schi fahre chöi die chuum, but es bitzli english rede.  
  
U we die finally unge a cho si, muesch säge  
Obenabe chöme si no, nume sötte si d Schi nid träge.

9.  
Dä z Italie, het sy Visage, tuet me brichte,  
La lifte, glette u sy Nase nöi la richte.  
Sy Politik, meint är, tüei eim de nümme so gruuse.  
Aber - ou es gliftets Füdlegsicht lat Schyssdräck use.
10.  
Dr Wasserfalle droht gärn mit em Hörnligödu.  
We dä Sprayereie gseht, überchunnt dä Vögu.  
Steu dir au die Vögu vor i däm Zwänggring inne:  
Das flattered, zwitschered, da muesch ja afa spinne.
11.  
Mit mym Super-Handy chan i aues mache:  
Cha mit em äsämäsle, tschätte, geime, bache,  
Cha Musig lose, Fernseh luege, Würscht grilliere  
U nöi ou Fieber mässe, und s tuet so schön vibriere.
12.  
Im Bundeshuus ei Meis, s si Wahle, d Sach isch gloffe.  
Dr Bumerang vor CVP het d'Metzler - suber - troffe.  
Blocher chunnt mit Gott, dr Merz ersetzt dr Villiger.  
Scho wird dr Ziger u dr Appizäuer billiger.
13.  
Dr Janet Jackson ihre piercte, blutte Buse  
Luegt bi mene Uftritt plötzlech us der Bluse use.  
Ei Ufschrei i de Schaate, Liecht us, nüt meh z gaffe.  
Dr Gheimdienschte meint, das Büppi sig e Biowaffe.
14.  
Dr Fuchs het d Tollwuet, bysst u frisst u stopft si Ranze,  
Schnapppt nach dr Begert, tuet geng us dr Reie tanze.  
Blast sich uf, macht Stunk u giftelet u schnödet.  
Am Änd blybt Fleisch u Chnoche, dr Räscht isch scho verblödet.
15.  
Mi Aut chunnt hei, är schtrahlet, bringt mer roti Rose.  
Är het es frisches Hemli an u d Sunntigshose.  
S isch üse Hochzytstag, es Gschänk – säg, spinnts de Manne!  
Es Riesepack! Drin 15 glychi Cooppunktpfanne.

